

皇明詔令

九





皇明詔令卷之十九

今聖上皇帝

即位大赦詔

正德十六年四月二十一

奉

天承運

皇帝詔曰朕承

皇天之眷命賴

列聖之洪休奉

慈壽皇太后之懿旨

皇兄大行皇帝之遺詔屬以倫序入奉

宗祧內外文武羣臣及耆老軍民合詞勸進至于再

三辭拒弗獲於四月二十二日祇告

天地

宗廟

社稷卽皇帝位深思

付託之重實切兢業之懷惟我

皇兄大行皇帝運撫盈成業承熙洽勵精雖切化理

未孚中遭權姦曲爲蒙蔽潛弄政柄大播凶

威朕昔在藩邸之時已知非



皇兄之意茲欲興道致治必當革故鼎新事皆率由

乎

舊章亦以敬承夫

先志自惟涼德方在冲年尚賴親賢共圖新治其以  
明年爲嘉靖元年大赦天下與民更始所有  
一合行事宜條列于後

一自正德十六年四月二十二日昧爽以前官  
吏軍民人等有犯除謀反叛逆子孫謀殺祖  
父母父母妻妾殺夫奴婢殺主殺一家非死  
罪三人採生折割謀殺故殺蠱毒魘魅毒藥

殺人強盜妖言奸黨失機并事干邊方夷情  
及人命至死罪者不赦外其餘已發覺未發  
覺已結證未結證罪無大小咸赦除之敢有  
以赦前事相告言者以其罪罪之

一自弘治十八年五月十八日以後正德十六  
年四月二十二日以前在京在外內外大小  
官員人等有因忠直諫諍及守正被害去任  
降調遷改充軍爲民等項及言事忤旨自陳  
致仕養病等項各該衙門備查明白開具事  
情奏請定奪死忠者諭祭修墳廕叙降調遷



改致仕養病閒住充軍爲民者起復原職酌量陞用大臣量進階級并與應得恩廕人夫月糧相應起用者有缺推用已故者加贈

一正德十四年文武官員人等爲因諫止巡遊跪門責打降級改除爲民充軍等項該部具奏起取復職酌量陞用被打死者情尤可憫各追贈諭祭仍廕其一子入監讀書內有充軍故絕者一體追贈諭祭查訪親屬量與優養

一王府冊封朝廷大禮今後該部務要照舊制

一年一次舉行

一各處王府應得祿米有缺少者各該巡撫都御史督率所屬查催完納

一各處郡王將軍府子女有應請名請封選婚者本府卽與保勘奏請承奉長史等官不許刁蹬其有年已長成未曾婚配貧難無力者所在官司量爲助給

一各處郡王將軍中尉有因事革減祿米者除毆殺人命敗倫傷化外其餘自詔書到日爲始俱照舊支給儀賓有因成婚年遠不曾赴



京謝恩叅奏者悉皆宥免

一自正德元年以來諸色人等傳陞乞陞大小官職盡行裁革吏禮兵工四部各將查革過傳陞乞陞文武僧道技藝官員名數類奏查考其王親及公主所生子孫原無出身正途朝廷推恩陞授者不在此例

一兩京五府見任掌印僉書管軍管事公侯伯都督及都指揮兵部等衙門見任文職四品以上官并各處巡撫官俱聽自陳去畱取自上裁武職內有傳旨管事者革去管事照舊

帶俸文職五品以下兩京吏部會官考察

一內府各衙門見任官員有從侍年久供事勤

勞願告優閑者許各具本陳情取旨定奪

一給事中御史職當言路今後凡朝廷政事得

失天下軍民利病許直言無隱文武官員有

貪暴奸邪者務要指陳實跡糾劾在外從巡

按御史糾劾

一官吏軍民人等犯罪自正德九年正月二十

八日以後已問結立功哨瞭運灰運炭運磚

運石做工納米納料納鈔擺站煎鹽炒鐵充



儀從軍伴膳夫及罰班重歷拘役枷號等項  
悉皆放免中間若係行止有虧敗倫傷化例  
該帶俸差操革職役爲民者仍各照例發落  
一武職官降級調衛者除失機事干邊情不宥  
外其餘俱復職回衛內原係錦衣衛者調在  
京別衛文職因公錯并公事註誤降級者復  
原職內原職係京官者對品別用其因事革  
罷爲民者除事干行止有虧敗倫傷化外悉  
與冠帶閒住原係冠帶閒住及在京改調外  
任致仕者各照原職致仕

一各處武職有因私役軍人不及五名例前間  
擬降級者守邊失誤被賊搶擄人民不及五  
名情輕律重降級者俱復還原職其各邊軍  
人因失事饒免發遣常川守哨者亦免守哨  
一正德十五年十二月以前各處實徵稅糧馬  
草農桑人丁絹絲布匹絲綿花絨屯田皇庄  
庄田子粒牧馬草場子粒租銀及甲丁二庫  
蠟茶銅漆銀硃鹽課廚料戶口食鹽猪羊鷄  
鵝備用孳生馬騾山廠柴夫後府柴炭軍器  
沿河軍衛有司蘆葦茭草夫價及閘壩泉溜



洪淺等夫並椿草等料及曠役等項銀兩一  
應歲派歲辦奏派但係該納官錢糧物件拖  
欠未徵者盡數蠲免以蘇民困已徵在官該  
起解者照舊起解准作本戶以後年分該納  
之數各造冊奏繳查考敢有將已徵捏作未  
徵侵欺盜用者許諸人首告巡撫巡按及按  
察司官察訪拏問重治造冊官吏叅奏提問  
戶工二部差去催徵官員卽日回京  
一浙江等十三布政司并南北直隸嘉靖元年  
分內除漕運糧料四百萬石照舊徵兌起運

其餘夏稅秋糧馬草農桑人丁絲絹布匹絲  
綿花絨屯田皇庄庄子粒牧馬草場子粒  
租銀及甲丁二庫蠟茶銅漆銀硃等料不分  
存留起運以十分爲率俱免五分以蘇民困  
一京通二庫水次倉皇城各門京城九門各馬  
房倉場各皇庄等處但係正德年間額外多  
添內臣司禮監照弘治初年例查奏取回

一近年差出取物買辦織造燒造等項及腹裏  
地方并各邊各關但係正德年間新添分守  
守備內臣自詔書到日即便回京其各分守



守備內臣將官有正德元年以後夤緣改作  
鎮守分守及副總兵等項名色并分外多管  
地方加添責任者兵部俱查奏改正換給勅  
書

一自正德年來兩京各衛所容令無籍之徒冒  
籍投充並新添旗軍校尉勇士力士軍匠並  
內府各監局招收軍匠等役辦納官錢私役  
佔用不下八九萬餘歲支錢糧百萬餘石以  
致京儲虧耗歲用不繼關係非輕論法都當  
拏問追究但既遇赦姑容改正詔書一出但

係正德年間冒籍收充並新添及私自頂補  
額外投收等項人役並有名無人該衛所官  
按月支糧包辦月錢者即便各回原衛原籍  
隨住當差該衛所即將名伍開除回報戶部  
具數奏聞敢有捏奏存畱設計影射仍前冒  
支官糧者事發都押發遼東鐵嶺衛永遠充  
軍該衛所官吏拏問調烟瘴地面安置

一騰驤左等回衛勇士除弘治十八年兵部並  
科道官查出見役正數並事故外其餘詭冒  
名籍未經裁革仍又夤緣回衛虛掛名額者



各照原擬舍餘發原衛民丁發在京缺軍衛  
分各充軍役食糧差操已後勇士替補照例  
開送兵部驗軍官處驗過方許收糧

一權勢中鹽侵奪民利並客商中鹽增價轉賣  
俱問罪入官律有明禁邇年以來奸商投托  
勢要每遇開中盡數包佔轉賣取利甚至奏  
開殘鹽減價中支每米一石支鹽四引任場  
買補夾帶私鹽阻滯正課以致鹽法大壞邊  
儲告乏罪雖宥免鹽當追沒詔書到日巡鹽  
御史並各運司官即便查訪鹽糧勘合內坐

到已支未掣並未派未支鹽課但係商人投  
託勢要詭名佔中賣窩買窩及河東運司鹽  
課例該宣府中納被勢要奏討賣窩別處開  
中並奏開殘鹽減價報中者悉照大明律裁  
革入官不許放掣派支敢有將勢要中鹽賣  
窩買窩情由設計隱瞞仍舊冒支官鹽掣賣  
者許諸人首告給賞正犯追完鹽課發邊遠  
充軍千碇勢要奏聞處治巡鹽御史運司官  
吏知情容令掣支各治以罪其見堆皇鹽並  
各處已賣銀兩未賣鹽觔盡數入官各項入



官鹽課巡鹽御史作急回奏戶部查照邊儲  
急缺去處開中本色糧料以濟急用

一在內御馬倉天師庵中府二草場在外壩上  
等十九馬房倉吳家駝裏外牛房司牲司司  
牧局今年合用糧料草束於原會數內減去  
一半坐派以蘇山東河南北直隸小民困苦  
以後年分還著巡視科道官備查馬匹牛羊  
實在數目照數會計以免冒濫

一近年抄沒犯人庄田園圃戶部委官從公查  
勘如有倚恃權勢侵奪霸佔者審證明白歸

還本主管業若係原有及兩平置買價值無虧者照依時價變賣銀兩送大倉銀庫交收備邊若地畝數多離京五十里之外者行令該管州縣召人佃種照例起科

一抄沒犯人玄明宮地土原係軍民住居墳墓該給主者該部會同科道官逐一查勘明白給主管業

一近年各處鎮守協守分守守備等官違例奏帶人衆到於地方科歛財物奪佔功次所在不才官員因而乘機指一科十貪利成風以



致百姓受害深可痛心詔書到日例外奏帶  
人員即便各回原衛原籍閒住當差違者許  
撫按并按察司官察訪叅奏拏問官舍旗軍  
調邊衛差操民發口外爲民書辦省祭等官  
革職不叙今後敢有仍前奏帶人多及帶軍  
民職官錦衣衛旗校者該科即時劾奏究治  
其鎮守等官中貪刻顯著壞事有名者各該  
巡按御史指實具奏取回司禮監從公推舉  
平素廉靜老成之人奏請更替仍照舊例寫  
勅不許干預錢糧詞訟侵越諸衙門職掌亦

不許假以進貢爲名僉取皂隸科歛銀兩擾害軍民額外進貢一切停止

一漕運官軍僨運糧儲經年累歲不得休息貧苦可憫正德十四年以前京通二倉若有掛欠糧米蓆皮板木腳價一切赦免其南京並臨德徐淮水次拖欠者不在此例

一正德元年以後在京在外官旗軍舍人等但係例外奏帶及稱報效在各邊各處或一人數處或一時兩三處報功及併功陞授官旗者除原祖職役照舊其餘盡行除革該衛所



各將革過名數造冊送戶兵工部查考敢有受財隱蔽不革及抗違妄奏者俱問發邊衛充軍其諸色人等冒認錦衣衛官員戶下舍丁致陞官旗者限三個月以裏許各官旗自首與免本罪冒籍之人革去職役過限不首該部查出或被人告發通行治罪發遣

一漕運官軍借欠債負利上生利爲害百端自正德十五年以前借者不拘多寡俱不許還以蘇漕運官軍困苦以後再借再放者聽漕運都御史巡按巡倉御史查例叅奏重治

一各處徵糧養馬地土內有水衝沙壓坍江等項負累人戶包養累經具奏者巡撫巡按官查勘明白具奏除豁

一各處解納錢糧到京內外管收人員刁蹬需索使用之數多於本物以致上納不敷重復徵解貽累小民該部申明禁約許被害之人指實奏告治以重罪

一南北直隸山東山西陝西湖廣浙江江西等處地方大軍經過及雖無軍兵經過但奉有明文取辦供應軍需等項所司動支官錢糧



應付者各該撫按官查勘明白准作正支銷  
不許復行徵補重困小民

一內府多餘宮人著司禮監逐一查審有親屬  
者各令的親家屬領回任其婚嫁無親屬者  
官與婚嫁務令得所

一在京抄沒犯人錢寧等并江西逆賊宸濠等  
入官財物除金銀并酒器首飾珍寶及違禁  
之物外其餘紗羅紵絲綾紬布絹鋪蓋衣服  
靴帽家火器玩等件若貯庫年久不無浥爛  
損壞可惜著戶部科道各差官二員查盤見

數估計鈔貫明白補放文武衙門官員正德  
十三十四十五年各上半年折俸之數若有  
多餘挨年再補

一各處無籍奸人遊食術士及無名內使私自  
淨身人等多有投託王府因而廢置害人甚  
則貽累宗室詔書到日許令自新各還本務  
各該撫按官仍要嚴加禁治不許故縱容畱  
以稱朝廷親親至意  
一文武官員有因事住俸罰俸回話者悉皆宥  
免



一南京內府各監局官員內使增添太多供用  
浩繁甚非

祖宗舊制司禮監便逐一查選照依弘治以前員數  
存畱供事多餘之數俱以本等職事聽用如  
遇各王府及南京各監局缺人請奏撥去應  
用其緣係海戶貢緣驟入者仍舊革免海戶  
見充海戶者禮部盡數發回原籍爲民當差  
不許在京清住其原係樂工淨身收入內府  
者亦盡數革退發南京

孝陵衛充軍

一私自淨身人多有在京潛住希圖收用著錦衣衛緝事衙門巡城御史嚴加訪拏究問今後各處軍民敢有私自淨身者本身并下手之人處斬全家發烟瘴地面充軍兩隣及歇家不舉首者俱治以罪

一宸濠之變都御史孫燧按察司副使許逵伏節死義并一時被害不屈之人日久尚未褒錄都御史王守仁倡義督兵平定禍亂并同事協謀有勞之人亦未及論功行賞該部即便會官議擬奏來定奪



一問刑衙門有抄提在官人口犯該反叛應連坐未給配安置者奏間定奪其有律不該載者悉皆放免原沒官房屋田產給還住種照舊納糧當差

一正德十二年十月內大同應州功次極爲冒濫內有傳陞文職者吏部查奏軍職除本邊官軍自斬首級例該陞級外其餘陞者不分己未領受兵部查奏裁革

一近年軍職人等在各邊不曾斬有首級巧立當先衝鋒等項名色及各處斬首不及數該

部照例擬賞奉旨陞級世襲者兵部通行查  
革

一武職並舍人舍餘旗校納銀等項授職並冠  
帶者獲功止許於實授職役上加陞

一賜姓人員及見犯罪冒姓者各復本姓在京  
者各照原有本等職役閒住隨住當差在外  
取到畱用者不分官職大小各回原衛帶俸  
閒住但有賜姓義子廕陞職爵並與做勇士  
等項食糧名色兵部盡行查革原係在外官  
員罷閒並原跟犯罪勢要無名籍惡黨俱不



許在京潛住違者錦衣衛巡城御史五城兵馬司挨拏遞解窩家送問

一在京武職除近選軍政並會保將材外其餘有告願調改外衛者該部查勘相應具奏改調仍聽撫按官照例考選管事

一軍職病故子孫告襲扣算年月但在十年以裏該衛查勘明白送到部者卽與收選免其駁查

一錦衣衛校尉專係直駕人役近年多有奏討投託濫佔跟用因而令其幹辦私事脇制害

人該衛盡行查明取回

一南京年例進鮮馬快船隻舊例每起三隻正德元年以來違例撥給比舊加多攬載客貨沿途攬擾本等廩給夫役之外勒要銀兩數多甚爲民害兵部出榜通行禁約今後進鮮船隻務照舊例撥給經過地方不許分外生事勒要折乾銀兩違者巡按巡河等官指實叅奏不許故縱

一順天保定河間三府各州縣自正德三年以來寄養馬匹俱各年齒衰老節次兌軍揀退



不堪負累小民餒養兵部行文太僕寺分管  
官督同該府州縣管馬官勘實果係老馬變  
賣價銀轉解太僕寺貯庫奏補買馬支用

一法司錦衣衛見監罪囚中間或煅煉成獄或  
拘泥文案多有枉抑今後問刑務要法當其  
情不許深刻所問犯人及在外問成解來人  
犯伸訴冤枉或別調衙門或多官會審務要  
從公推問實情果有冤枉卽與辦理不許拘  
執成案逼勒招認符合前問官吏致令枉抑  
無伸違者罪之

一凡問囚犯今後一依大明律科斷不許深文  
妄引叅語濫及無辜其有奉旨推問者必須  
經由大理寺審錄毋得徑自叅奏致有枉人  
近年條例增添太繁除弘治十三年三月初  
三日以前曾經多官奉詔命議奏准通行條  
例照舊遵行外以後新添者悉皆革去

一江西並各處地方先因宸濠反逆事敗及因  
人告報謀反妖言等項事情一時追捕餘黨  
急於撲滅不暇審辦未免有跡涉疑似被誣  
逮繫者經該問刑衙門務要嚴加詳審果係



誣枉卽與釋放若係逼脇順從者問擬明白  
奏請定奪毋得冤抑淹禁

一內外各衙門見監死罪重囚犯在赦前罪不  
該宥內有情可矜疑曾經奏請未得饒死及  
毆傷人延至辜限外身死照例仍擬死罪者  
詔書到日覆審是實俱免死發邊衛永遠充  
軍若有辨問罪不致死者卽行查照發落  
一見監與宸濠謀反事情有干正德十四年就  
陣擒獲及續拏人犯三法司錦衣衛先行會  
問明白其真正共謀逆賊并臨時脇從及先

年交通不曾與謀者各依律議擬應得罪名  
再會多官覆審相同具奏定奪毋致轉從冤  
枉

一各處盜賊多因饑寒困苦流離失業脇從逼  
迫嘯聚爲非詔書到日各該官司通行出榜  
曉諭許其自首免罪軍還原伍民還原籍各  
存恤二年免其差徭其有能擒捕首惡并黨  
類報官者照例陞賞仍量給犯人財產

一官吏軍民人等自正德九年正月二十八日  
以後至正德十六年四月二十二日以前有



爲事間發充軍遷發爲民者除原係真犯死  
罪饒死及事干謀反逆叛奸黨失機強盜撥  
置侵盜係官錢糧指稱打點誑騙者不赦外  
其餘悉皆放回原衛原籍寧家隨住若有赦  
前逃回不首原係真犯死罪饒死充軍例該  
照依原擬處結并原係雜犯死罪以下充軍  
例該枷號改發極邊衛分者免其處決枷號  
改發仍各發原充衛所著役其遷發爲民者  
免其間罪仍發原編配所

一內外各衙門囚犯該追贓物係還官給主銀

貨至五十兩以上并入官至一百兩以上監  
追一年之外及正犯身故拘禁家屬各勘無  
家產堪以變賣賠納者開具所犯情罪奏請  
定奪其不及前數監追半年之外及正犯身  
死各勘無家產并例該追罰馬牛等項悉與  
宥免查照發落若係埋葬銀正犯見在者仍  
依律追給

一內外各衙門有問完官吏軍民人等罪犯已  
經奏請未曾奉旨發落應該宥免者卽行查  
照發落其有監候行勘未報人犯罪該宥免



者並正犯在逃監禁家屬證佐不係事干謀反逆叛劇賊者悉令保候歸結

一近年節次奏開生員納銀入監事例積累數千餘人大壞選法今後再不許奏開違者吏部該科卽時糾劾究治已開未納者卽便停止至於額設吏役亦須得人近年納銀收充阻塞正途之人致令歇役革退雖有考選事例繁復不一吏部便查會典開載選撥吏役舊例申明遵守行令各布政司直隸府州凡遇缺吏從公考選徑自收叅納銀人役務令

習學書字通曉文移方許收叅若願告改撥  
衛所事簡衙門者聽俱開報巡按御史查照  
訪察內有選撥不公或被人告發按問得實  
依律究治

一各營書辦人員除大營額設員數外其餘額  
外添設者并各夷方遠年不用小通事冒濫  
保補者通行查革

一工部供應內府各監局內官內使人等年例  
柴薪靴料皮張冬衣鋪陳紵絲綾紬紗羅等  
項近年以來增添數倍該部往往借貸別項



官錢湊用動經數萬累及官民終非經久之計著司禮監會同該部查照永樂至天順年間人員數目關給則例通融處置除見有本色物件外不敷之數將近年抄沒犯人贓物銀兩兩平估折相兼俵散准作正德十五年十六年年例之數少寬民力

一兩京各監局等衙門近年額外增添器物如龍船戰車神像店房等項數多管事人員乘機作弊將物料工作任情冒派侵尅害民今後除舊額器物房屋應修理成造者俱照會

典所載舊定數目從實會計除本衙門并各  
庫會有會外無者量爲從省派辦不許隱匿  
冒濫改舊添新并招買那借貽累小民違者  
治罪

一內府禁密之地方不許蓋造離宮別殿載在  
祖訓萬世當遵近年以來節被左右近倖之人獻諂  
希恩在內添蓋新宅佛寺神廟總督府神武  
營香房酒店之類在外添蓋鎮國府總督府  
老兒院玄明宮教坊司新宅石經山祠廟店  
房等項便著內官監工部錦衣衛科道官逐



一查勘但有不係舊規者或拆毀改正或存  
畱別用或變賣還官官匠人等有因蓋造陞  
官者亦就查革改正在外者聽撫按官一體  
查勘改正變賣還官不許隱匿

一近年南京駕到各樣船隻數多俱在通州張  
家灣停泊勞人看守日久損壞無用著內官  
監工部便去會勘除年例黃船照舊存畱聽  
候外其餘烏龍船發送南京兵部改正擺江  
船黃船發送南京工部照舊看守聽差黑樓  
等船發送杭州府等處聽候進鮮龍衣等項

公用免派民間修造其餘魚船等項變賣價銀收貯監部以備修造正支

一荊州杭州蕪湖三處抽分廠專爲打造糧船成造供應器皿而設以省科派小民之計近來南京各監局相沿具奏差人赴蕪湖廠支取杉楠等木數多又有內官監差官中半抽分二年有餘致將造船銀料不敷支給累及運軍出利揭債缺船運糧耽誤國計今後南京各監局合用竹木聽于本處龍江瓦屑等抽分廠支取在京各監局合用竹木聽于內



官監神木廠并眞定盧溝橋等抽分廠支取  
其內官監原差抽分太監李文等詔書到日  
卽便回京以後不許援例奏差

一天下司府州縣抽分稅課衙門俱有定額近  
年以來凡橋梁道路關津有利處所私自添  
設無名抽取數多甚爲民害詔書到日巡按  
御史及按察司分巡官通行查革有司嚴加  
禁約不許坐視故縱

一河防水利小民衣食之源關係最重各有專  
官管理該管官員務要躬親巡歷嚴督所屬

修築圩岸疏濬溝渠但有權豪刁潑之家修  
建池亭設立碾磨阻壞水利坑陷錢糧者並  
聽自首拆毀改正與免本罪若有抗拒官府  
執迷不首者隣佑之人舉告究治所在官司  
容情故縱者事發一體治罪

一易州山廠柴炭今後悉遵先年舊額派納惜  
薪司近年新添加耗之數俱改正照舊其有  
攬頭指稱打點多勒價銀許被害之人首告  
管廠侍郎痛加改革不許仍踵前弊如違治  
以重罪



一自正德年來劉瑾錢寧江彬相繼擅權在京  
在外各衙門弊政多端詔書該載不盡者許  
逐一自行議奏裁革

一近來冒濫玉帶蟒龍斗牛飛魚服色數多除  
五府九卿堂上官外其餘庶官雜流并各處  
將領頭目諸色人等但係賁緣奏乞傳賜者  
俱不許穿用內府各監局官員司禮監查奏  
裁革武職卑官僭用公侯服色花樣者一體  
禁約

一浣衣局近年抄沒婦女法司逐一吊查原卷

詳究事由情有可矜宥者具奏釋放

一錦衣衛旗校人等除弘治年間編軍冊內見在數目外其餘詭名頂補僉補在逃故絕等項人役冒濫食糧者戶兵二部各差選屬官會同科道及本衛公正官查議裁革

一豹房各處積年收貯并近日抄沒犯人銀兩司禮監查計明白數內運送數百萬兩於太倉銀庫收貯以備折放官軍俸糧等項支用

一正德元年以後各衙門官軍旗校人等緝捕妖言奸細并不係臨陣對敵強賊一應陞授



職役者通行查革以後各衙門照舊年終類  
奏兵部查議陞賞

一正德年以來傳陞乞陞佛王法子國師禪師  
等項禮部盡行查革各牢固枷釘押發兩廣  
烟瘴地面衛分充軍遇赦不宥近日奏討祭  
葬一切停革其中有出入內府住坐新寺引  
誘蠱惑罪惡顯著見在京者禮部通查明白  
錦衣衛拏送法司問擬罪名奏請定奪

一先在軍門辦事指揮張璽張倫及掌案寫字  
等項人員宮勲趙真殷大安王鎬王纘陳貴

龐璽晁用鄭曦賈銘高湜朱鳳翔管皇石千  
戶趙謹姚俊俱倚勢生事蠹政害人內外軍  
民怨入骨髓本部當處死姑從寬各連當房  
家小押發兩廣烟瘴衛分永遠充軍其餘跟  
隨辦事管店助惡有名小班答應旗校人等  
錦衣衛選送法司究問中間罪跡顯著者一  
體押發兩廣烟瘴衛分永遠充軍家小隨住  
俱遇赦不宥

一回夷寫亦虎仙交通土魯番興兵構亂攪擾  
地方以致哈密累世受害罪惡深重曾經科



道鎮巡官勘問明白既而實緣脫免錦衣衛  
還拏送法司查照原擬開奏定奪

一回回人于永出入豹房誘引蠱惑情罪深重  
錦衣衛拏送都察院追問明白議擬罪名奏  
請處治

一今後照依舊例給事中有缺於進士內考選  
奏補御史有缺進士與行取人員相兼考選  
除授

一朝廷政事得失天下軍民利病許諸人直言  
無隱

一己上興革政令詔書到日有司卽便奉行如  
有延緩者許巡按御史按察司訪察究問俱  
以違制論

於戲君人之道在昭德以塞違繼世之規惟更  
化而善治特頒渙號用慰輿情弘施大賚之  
恩永錫太平之福四方臣庶咸使聞知

尊諡詔

正德十六年五月十一日

奉

天承運

皇帝詔曰自古人君功德施於當時咸有顯號隆名



以祔于廟饗傳諸萬世我朝

列聖相承率由茲典有不可易者恭惟

皇兄大行皇帝以

英武之資

剛健之德嗣登

寶祚十有七年于茲矣

任賢圖政

節財阜民克詰戎兵屢平僭亂

淵慮弗遑於寢食

皇威昭布於邇遐真有安不忘危持盈保成之志用

是宇內咸乂邊陲晏然治理之興方有望於  
今日夫何不幸

龍馭上賓天下臣民攀號莫逮顧予涼薄肇纘

鴻基允惟

付託之難方深在疚之慟追慕

遺烈率遵

舊章謹命在廷文武羣臣叅稽禮文議薦

謚號博采衆論協于至公乃於今年五月初八日祇

告

天地



宗廟

社稷奉

冊寶恭上

大行皇帝尊諡曰

承天達道英肅睿哲昭德顯功宏文思孝毅皇帝

廟號

武宗於戲

盛德法乎乾剛實揄揚之莫罄

徽稱薦夫殷禮尙昭顯於無窮布告萬方咸宜知

悉

尊號詔

嘉靖元年三月十五日

奉

天承運

皇帝詔曰自古帝王以孝治天下尊親之禮其來遠

矣仰惟

聖母慈壽皇太后敬相

皇考孝宗皇帝訓育

皇兄武宗皇帝含弘光大蔚有顯聞

皇兄奄棄臣民之日中外岌岌賴我

聖母上念



宗社大計擁翊冲人入繼

大統及剪除兇逆潛消禍變呼吸之際安定家邦

功德并隆揄揚莫既不舉尊崇之典曷伸孝敬之

誠

皇嫂皇后巽順含章安貞應地伉儷

宸極表正宮闈母儀有年名稱宜異重念

聖祖母貴妃聖善慈仁靜專明哲事我

憲祖贊理內庭燕禩兆祥澤隆佑啓

本生父興獻王聰明天授仁孝夙成河間好禮東平

樂善餘慶流行垂裕後人

本生母興獻王妃莊敬持身儉勤治內嫺德任姒遠

嗣徽音誕育眇躬丕承

前烈雖傳序之統義有所專而天性之恩自不容已

用是遠稽載籍博采公言率籲文武羣臣謹

奏

冊寶

聖母尊號曰

昭聖慈壽皇太后

皇嫂曰

莊肅皇后又奉

聖母懿旨上

聖祖母尊號曰

壽安皇太后

本生父母曰

興獻帝

興國太后大禮既舉洪恩誕敷所有合行事宜條列

于後

一宗室有年七十以上者各賜米十石絹十匹  
凡一應禮儀有衰病不能自行者子爲代行  
以示優老之意



一宗室爲庶人者各賜米八石絹八匹其子女  
人賜米五石布五匹年及婚配者所司具名  
以聞照例選婚量助嫁娶之資俱令有司辦  
給

一鳳陽高墻庶人還各查原犯情罪輕重來聞  
一軍民之家有年七十以上者許一丁侍養免  
其雜泛差役八十以上者仍給與絹一匹綿  
一斤米一石肉十斤九十以上者倍之其男  
子八十以上有爲鄉里所敬服者加以冠帶  
以榮其身

一軍民之家有五世同居共爨不分異者有司  
具實奏聞照例旌表詔書到日先給羊酒獎  
勸

一孝子順孫義夫節婦有司具實奏聞照例旌  
表其已旌表年及六十者男子冠帶榮身婦  
人照八十以上例給賜絹綿米肉

一各處帝王陵寢名臣賢士墳墓有被人毀發  
者所在官司卽時修理如舊令附近民人一  
丁看護免其雜泛差役其餘墳墓但有露棺  
暴骨者悉與掩埋

一近年各處盜起有貞烈女婦被賊殘害志節不屈行跡顯著者撫按官查勘是實明白具奏俱與旌表門閭

一各處用兵地方軍民職官有沒于戰陣者撫巡官查勘明白具奏定奪軍民死於鋒鏑及凍餒死亡無人收埋者所在官司俱與掩埋毋致暴露

一弘治十八年以後內外大小官員死忠者及正德十四年文武官員人等因諫止巡遊已經各衙門奏請追贈廕叙者其父母妻室不



拘存歿俱得受封贈親老寡妻無人侍養者  
有司量加優恤

一文職致仕一品未受恩典者有司月給食米  
二石歲撥人夫二名應用二品以上年及八  
十者備綵幣羊酒問勞九十以上者具實奏  
來遣使存問五品以上以禮致仕年七十以  
上者進散官一階其中廉貧不能自存衆所  
共知者每歲仍給米四石以資養贍不許徇  
情濫給

一兩京文職官員未及三年考滿者俱與應得

諸勅若父母見存先已受封其子官職遷轉者服色許與子同後不爲例其曾經奏准給與誥勅未曾關領因事降調非貪淫酷刑者給與原給誥勅

一武職應得誥勅已經請給年遠未曾撰黃者膳黃官上緊查撰兵部奏請關軸書寫給散一各王府官有年老願致仕者進散官一級其歷俸三年以上父母見存該受封者給與誥勅封之後不爲例

一軍官老疾不能任事告替職者准令兒男赴

部替職免其自來

一弘治十八年以前軍職有紀功核實曾經查

革者兵部還查奏定奪

一軍職先年降調兩廣等處病故者子孫爲因

路遠不能承襲許令原衛承襲帶俸差操

一將軍年及五十歲侍衛二十年以上者不拘

一在役退閒俱與冠帶以榮終身

一吏部給由等項聽選官取選未至願告致仕

者俱陞職一級致仕監生不願出仕者己有

授職事例今後還填註衙門給與散官吏員



冠帶聽選願告回家不出仕者照格填授衙門職名開住在原籍者俱各赴各該司府衙門告勘給授仍類冊繳部以憑查考

一內外衛所軍士月糧多被該管官旗假以公用爲名扣除克減不得全支老幼無所養贍及在外沿邊收糧官攢人等通同勢要親屬包攬插和沙土糠粃虛出通關致令倉庫空虛支給不時軍士困苦令所在風憲官員訪察拏問追究治以重罪

一各處府州縣預備倉糧賑濟饑荒有例見行

官吏人等奉行不至多無實効今後務要設  
法措置驗時豐凶歛散年終將收除實在數  
目開奏有能多積至數萬石以上者量加旌  
擢巡按守巡官時常往來督理

一各處僧道有父母見存無人侍養不問有無  
度牒願還俗養親者聽

一在京在外有鰥寡孤獨廢疾不能生業者卽  
便收入養濟院照例給與衣糧母令失所已  
收養者人各賜米三斗其各州縣貧難戶丁  
例該優免者不許一槩編當差役

一詔書內各項恩典軍衛有司務在着實舉行  
不許虛應故事

於戲愛由親始廣孝必因乎心恩以序推爲治  
可運於掌詔告天下咸使聞知

立后詔

嘉靖元年十月十一日

奉

天承運

皇帝詔曰君理外治后理內治天下之大義也自古  
聖帝明王彝章具載朕繼承大統夙夜孜孜  
敷求賢哲共圖治理近者



聖母昭聖慈壽皇太后念內治之重特諭所司簡求  
令淑作配朕躬朕勉遵

慈命乃敢昭告

天地

宗廟於嘉靖元年九月二十八日冊立陳氏爲皇后  
正位中宮以供承宗祀奉養

四宮用衍本支萬萬年之慶布告中外咸使聞知

遇變修省勅

嘉靖元年十月初十日

皇帝勅諭天下文武衙門官員自古帝王臨御天下

必以敬

天勤民爲首務我國家

列聖相承率由是道朕嗣守鴻業深惟

祖宗付託之重臣民屬望之深夙夜兢兢不遑寧處

自踐祚之後

上天垂戒災沴疊見今年七月內南京應天及淮揚  
等府俱有大風雨之變

陵寢震驚江水湧溢漂流房屋不下數萬餘間沒溺  
男婦無慮數萬餘人死者積屍暴露生者流  
離轉徙而江西湖廣廣東廣西等處亦有非  
常水患內自修省罔知所措意者敬

天勤民道有未盡永惟厥咎在予一人百姓何辜罹  
此艱厄朕方齊心積誠祇告

天地

宗廟

社稷與爾內外文武羣臣同加修省以回

天意尤念四方之遠民瘼甚多比年以來兵荒相繼  
征調不息加之法度廢弛賞罰不明軍民受  
害財力兩殫寬詔徒頒奉行未至官府之催  
徵不已倉廩則所在空虛朝廷德意顧爲姦  
貪之騙局小民脂膏祇供典守之侵盜上官



以逢迎爲能，臧吏以科罰相尚，賢否舉劾多有不當，刑獄輕重多有不平，閭閻之間疾苦萬狀，念之痛心。言之蹙額，今雖痛加釐革，餘風或有未殄，天地至和之氣，寧不爲之感傷。爾天下軍衛有司衙門官員，職雖不同，義均休戚，宜各督所屬，各慎所司，盡革因循積習之弊，益勵廉慎不渝之節。各該撫按守巡等官，俱要躬親巡歷，宣諭朕意，被災人戶加意賑恤，死而暴露者，官與瘞埋，生而流徙者，設法招復。一應歲額錢糧與凡歲派物料徵收

必以其時出納必稽其弊已起解者務濟公  
家之實用應蠲免者務見詔旨之實惠獄訟  
勿令久禁聽斷勿致偏枉勿過刻以害良善  
勿太寬以長姦惡贖罪紙米勿令折價入已  
往來迎送勿得阿意勞民先年用兵經過及  
今次災傷地方但有死於非命者除厲壇常  
祭外各令所司另舉一祭祭文仍從該部降  
去各該屬官中但有貪婪殘酷者具實奏黜  
誠心愛民者雖雜流出身一體旌獎勿以奉  
承之能否爲愛憎勿以一己之愛憎爲進退

凡百行事務要奉公守法期於消除民患培  
養國脉以稱朕敬

天勤民之意以延

宗社億萬年無疆之休爾等其欽承之故諭

尊號詔

嘉靖三年四月十九日

奉

天承運

皇帝詔曰朕恭膺

天命嗣承

皇兄武宗毅皇帝大統祗奉



宗祀惟我

皇考孝宗敬皇帝神謨聖政是繼是行夙夜孜孜圖  
惟化理以治本於孝故雖天子必有

所尊仰惟

聖母昭聖慈壽皇太后擁翊之功至大莫罄名言

本生父母

興獻帝

興國太后鞠育之恩至深罔殫報稱

尊稱未極恆用慊然爰稽舊章祇告于

郊廟

社稷率文武羣臣恭奉

冊寶加上

聖母尊號曰

昭聖康惠慈壽皇太后

興獻帝尊號曰

本生皇考恭穆獻皇帝

興國太后尊號曰

本生聖母章聖皇太后義專隆於

正統禮兼盡夫至情既舉縟儀肆彰大慶合行推恩

事宜條列于后

一宗室有年七十以上者各賜米十石絹十匹  
凡一應禮儀有衰病不能自行者子爲代行  
以示優老之意

一各處王府應行祿米有缺少者各該巡撫都  
御史督率所屬查催完納

一各處郡王將軍府子女有應請名請封選婚  
者本府卽與保勘奏請承奉長史等官如有  
刁蹬延捱致令子女年過二十以外有未成  
婚者撫按官查舉治罪

一各處郡王將軍中尉有因事革減祿米者除



毆殺人命敗倫傷化外其餘自詔書到日爲始俱照舊支給儀賓有因成婚年遠不曾赴京謝恩叅奏者悉皆宥免

一軍民之家有年七十以上者許一丁侍養免其雜泛差役八十以上者仍給與絹一匹綿一斤米一石肉十斤九十以上者倍之其男子八十以上有爲鄉里所敬服者加以冠帶以榮其身

一孝子順孫義夫節婦有司開具實跡奏聞以憑旌表不許里書人等指勒刁難致令轉展

無由上達若守節年久果有貞烈實跡例應旌表而身故者一體奏聞舉行其已旌表年及六十者孝子冠帶榮身節婦照八十以上例給賜絹綿米肉

一軍民之家有五世同居共爨不分異者有司具實奏聞照例旌表詔書到日先給羊酒獎勸

一兩京文武官員七品以上未關誥勅者若父母見在先與誥勅封之不爲常例

一軍職先年降調兩廣等處病故者子孫爲因

路遠不能承襲許令原衛承襲帶俸差操

一內外官員有父母在家願分俸助養者准令

分俸於原籍關支

一軍官老疾不能任事告替職者准令兒男赴

部替職免其自來

一在京各衛帶俸官有願出外衛者許自陳照

例住與相應地方衛所管事差操

一各處小民有因衣食不給流移他鄉者詔書

到日各還本土有司務要加意撫恤俾遂生

業仍免糧差一年違者許巡撫巡按官究治



一朝廷憫念小民凡事減省今後不差人出外  
買辦採辦物件有司不許仍前指以均徭公  
用爲名科歛銀兩及因小故罰取財物因而  
克落入己其司府州縣官員亦不許額外多  
僉阜隸侵漁小民但有違者許巡撫巡按官  
體訪叅奏治以重罪

一各邊軍士比之腹裏勞苦尤甚爲鎮守總兵  
等官者不肯撫恤反行克害有財者占納月  
錢有力者役使耕種其不役占者不免重差  
軍士受害如此豈有銳氣禦寇今後該管內

外官員務要改過自新不許仍前役占

一監生有衰老不願出仕者但係聽選之數俱照例量授職銜吏員冠帶聽選願告不仕者照資格授與職銜其在原籍者許各赴司府衙門陳告類冊繳部一體給授

一各處軍民人等有因刁蹬害人曾經問發充軍爲民遇例放回者該管官司時加省諭務要改過自新若仍蹈前非起滅詞訟誣害良善挾制官府事發枷號三箇月仍照例問發邊遠充軍

一在外文職官員有親老告回侍養者親終之日仍許赴部聽用

一各王府官有年老願致仕者進散官一階其歷俸三年以上父母見存該受封者給與誥勅封之不爲例

一將軍年及五十歲侍衛二十年以上者不拘在役退閒俱與冠帶以榮其身

一在京在外文武官員有因事罰俸住俸者詔書到日照舊關支

一內外衛所軍士月糧多被該管官旗假以公



用爲名扣除尅減以致軍士不得全支及在外沿邊收糧官攢人等通同勢要親屬包攬插和沙土糠粃虛出通關致令倉廩空虛所司風憲官訪察拏問追究治以重罪

一各處衛所官軍月糧有經年累月不得關支者撫按官督率司府等官量爲處給以甦民困

一內外衙門見問囚犯除死罪并已發落外其餘犯該徒流笞杖及枷號者詔書到日悉宥其罪官吏監生生員承差知印陰陽醫生校

尉行止有虧敗倫傷化例該充軍爲民等項  
仍照例發落照提未到者公罪除提其餘仍  
提問擬明白俱照前例發落奉旨勘問者奏  
請定奪

一兩京法司及在外問刑衙門近年以來軍民  
詞訟不行卽時問理又聽犯人展轉攀扯以  
致淹禁日久因而病死者往往有之冤抑不  
伸致傷和氣今後務要上緊問結毋致枉濫  
一各處有等主文書算快手皂隸總甲門禁庫  
子人等久戀衙門說事過錢把持官府起滅

詞訟灑派稅糧賣放強盜誣執平民陷害良  
善者巡撫巡按布按二司官訪察拏聞發邊  
遠充軍

一天下祀典神祇所以保庇生民有司務在誠  
敬奉祀壇廟損壞隨卽脩理毋致褻瀆廢弛  
一各處盜賊多因飢寒困苦流離失業脅從逼  
迫嘯聚爲非詔書到日各該官司通行出榜  
曉諭許其自首免罪軍還原伍民還原籍各  
存恤一年免其差徭其夥內有能擒捕首惡  
并黨類報官者一體照例陞賞仍量給犯人



財產

一在京在外有孤老殘疾不能生業者即便收養濟院照例給與衣糧已收者人賜米三斗一詔書內各項恩恤事宜軍衛有司務在著實舉行不許虛應故事

於戲愛敬始於家邦致一人之達孝仁恩徧于海宇得萬國之歡心布告臣民俾咸知悉

皇明詔令卷之十九

皇明詔令卷之二十

今聖上皇帝

寬恤詔

嘉靖六年三月十三日

奉

天承運

皇帝詔曰朕惟人君奉

天明命統御萬方作人君長朕以菲薄之資起自宗

藩入繼

祖宗大統夙夜孜孜罔敢自豫惟敬

天法



祖親賢圖治以福斯民然必賴左右輔導文武羣工  
協心贊助以匡不逮夫自卽位以來災變頻  
仍而去歲之災尤大且異豈非政化未臻民  
心積怨上千

天和朕深驚懼寢食靡寧究其咎本實予一人所致  
而內外文武百官亦不無責輔導之臣不能  
盡誠贊襄部院之官不能協力任事居言路  
者言非忠謹職宣化者澤不下流弊政多端  
欺上虐下民心怨咨無所控訴朕深居九重  
四方民隱無由盡知特令部院科道各陳所

當興革事宜開具上請朕與輔臣采其切實  
可行者行之凡爾文武官員當痛加省戒深  
體朕畏

天恤民之意各盡乃職各修乃事爲上爲德勉効忠  
誠爲下爲民加意撫恤務期道洽政治民心  
忻悅上回

天意導迎休祥陰陽調和民物康乂以成熙皞之治  
勿得視爲虛文欽哉戒哉所有寬恤事宜條  
列于後

一凡兩京井在外文武官員均有分理天工之

責內則五府六部都察院等衙門外則都布  
按三司至於府州縣守令并衛所官居文職  
者務盡匡弼寅亮之誠任武職者必思禦侮  
折衝之略舉用才能懲戒貪污務合公論掌  
錢穀者足國裕民培植邦本典邦禮者和神  
人明風化司邦政者選將卒安邊鎮理刑者  
務刑罰平允司工者務營動及時管軍者當  
愛如己子牧民者當視如己傷宣布德澤勿  
壅遏而不下流出納命令勿蒙蔽而不上達  
一洗昔日之非勉効方新之政以贊朕一人



上承

天命下保生民倘若苟且玩慢稔過不悛因事有犯  
決罪不宥

一天下諸色軍民人等各要孝親敬兄教子睦  
族勤謹生理惇重人倫勿作非爲干犯有司  
勿倚衆強欺虐良善勿得暴殄天物淫近非  
神勿得聽信虛誕自廢人事當遵朕言人人  
奉守庶幾身不遭刑家不貽禍上光祖考下  
保子孫世世爲良民豈不美哉

一內外問刑衙門見問罪囚該徒流笞杖及枷

號者實宥其罪官吏監生生員承差知印陰陽醫生校尉行止有虧敗倫傷化及軍民人等有犯各例該帶俸調衛爲民充軍等項仍照例發落其未到官者仍提問擬明白俱照前例發落原奉旨勘問者奏請定奪

一各處實徵戶部稅糧馬草農桑人丁絲絹布匹絲綿花絨屯田子粒及甲丁二庫蠟茶銅漆銀硃鹽課戶口人鹽等項一應納官錢糧拖欠正德十六年四月二十二日奉詔蠲免者撫按官委官清查不許重徵正德十六年

以後嘉靖三年以前一應未完并帶徵等項  
錢糧但係小民拖欠者盡行蠲免已徵或被  
人侵欺者仍舊監追准照原價折納其監至  
十年以上家產盡絕者具奏定奪正犯身死  
無業抵補者卽與除豁若有將已免者重徵  
已徵捏作未徵及家產未盡朦朧除豁者許  
諸人首告從重究問

一在外軍衛有司受理詞訟止照律例歸結不  
許輒令供許遠年無干事情因而濫罰銀錢  
紙劄其應該贖罪紙穀仍發倉備賑仍置立



循環簿登記明白以備查考有仍前濫罰者查訪得出或被入首告照例起送問發

一京通二倉糧運掛籌例該追賠有經年比併淹禁不得完結者自嘉靖五年以前每石并蘆蓆等項量准折銀類解太倉以備軍官俸糧後不爲例

一宛大二縣各行鋪戶先年編有牌甲冊籍今後遇有內外各衙門一應供用買辦物料等項順天府查照原冊挨名派撥納完之日卽行給價不許縱容報頭人等指稱科歛虐害

小民違者許被害之人指實陳告照例枷號  
問擬發落

一各該問刑衙門有計贓擬罪徒流人犯所追  
贓不及一兩監追三月以上者及紙穀未完  
監追一月以上者悉皆宥免各照原擬發落  
一德州常盈庫收納山東河南各布政司解到  
花絨每年給散真定等一十八衛官軍爲因  
地方隔遠委官關領其弊多端今後本部會  
派之時查照每衛該領布花若干就令各大  
戶運赴各該衛分附郭州縣上納以便給散

皇明言令 卷二十一  
一各處起運京庫戶口鹽鈔今後每鈔一貫折銀一釐一毫四絲三忽每錢七文折銀一分計鈔一塊共折銀四兩大戶不得分外科歛侵欺入己

一兩京法司及在外問刑衙門受理詞訟不許聽犯人展轉攀指以致淹禁枉濫及酷刑拷打致傷人命有故違者在京許科道官在外聽撫按官訪拏查照律例從重問擬發落

一強盜人命等項死罪重囚有曾經法司及巡撫巡按審錄等官奏請矜疑并人命辜限身



死未得寬免及行再問者覆審是實俱免死  
發邊衛充軍篤疾犯該見監者悉從宥免其  
強盜追無贓仗年久不得結證及人命無屍  
檢驗累訴冤枉者各具實奏請定奪

一各處軍衛有司管解逃軍軍丁赴衛違限一  
年之上解人例發附近充軍軍丁發邊衛充  
軍者俱從宥免解人發回原籍逃軍軍丁發  
回原衛着役

一內外問刑衙門今後問擬囚犯罪名律有正  
條者俱各依律擬斷無正條者方許引例發

落亦不許妄加叅語濫及無靠

一各處災傷地方清軍御史暫且取回待後另行奏差

一巡撫巡按等官遇屬官不職事發先拘緊關干証人犯從公審勘供招明白然後指實叅拏如事涉風聞未得詳實者毋輒叅拏其所屬官亦不許擅行奏辯

一內外勢要之家不許霸占關廂場集橋梁渡口煤窖陂蕩及開張鋪店販賣鈔貫勒要牙保出店過路水面窖口籌錢等項侵害小民

違者許巡城巡按并該地方官員叅奏禁治  
一朝廷每遇災傷江南起運糧米改撥折色本  
爲優恤小民近來不才有司多將折色派與  
官豪大戶以作人情貧難戶依舊辦納起運  
糧米甚非恤民本意今後上司官員嚴加禁  
約遇有災傷折色糧米務令均分派使小民  
得沾實惠

一近年上司官員多以訪察拏人發與所屬官  
員問罪旣無原告又無指証逼令犯人自行  
想像供招中間固有得實者而被誣者亦多



甚至有枉問死罪充軍者奸人乘機報復私  
讎刁徒緣此肆行誣詐承委官員奉承意向  
明知虧枉不敢辯理今後撫按及二司官員  
問理詞訟止據告發提問若果訪有土豪大  
戶害衆成家欺隱田糧暴橫鄉人實跡顯著  
者方可拏問毋得輕信傳聞之言不論虛實  
輕重一槩訪拏其近年訪拏問過人犯已發  
落者除輕罪外事干死罪及充軍不係告發  
事無証佐者許其訴告卽與辯理勿得拘泥  
成案見提見問未結者卽便釋放

一各處州縣糧長之設專爲徵收解納錢糧先  
年人多樂當近來一當糧長無不破家蕩產  
蓋因僉點之時官吏受財聽囑將富豪之家  
指以納粟監生納銀王府官員義官等項除  
免止將善良人戶僉充應役之後州縣正官  
一應公私應用多令其出辦甚則令備土儀  
貨物紗羅段匹等項饋送往來勢要管糧佐  
貳官又復索要常例銀兩又有被鄉官勢豪  
不肯依時納糧過違限期上司督責虛文完  
報只得代伊輸納撫按官宜嚴加禁約今後

糧長除應免官員外其餘務從公僉克毋得  
賄囑脫免應役之後專一徵收錢糧不許科  
派出辦分文錢物及接受常例銀兩違者俱  
坐贓論勢豪之家不肯依期納糧依法究治  
一各處有司多有假以修理爲由動支官庫銀  
兩科罰小民財物名爲公事實濟其私上司  
信憑呈稟往往許其設法措置不免巧取於  
民今當民窮財盡之時宜加禁約除城垣坍  
塌不得不早整理其餘公館學舍驛遞一應  
屋宇非十分損壞不許擅自興工以勞民力



敢有指稱修理科罰民財者縱不入己亦照  
科罰事例起送降用

一今天下驛遞廢弛各該衙門不論事情輕重  
輒起符驗關文或平頭關文所差人役多將  
口糧改爲廩給脚力改爲馬匹又有齎執該  
管上司批牌迎送親戚故舊所至索要飯食  
下程嚇取打乾銀兩過關米糧往來官船多  
有索要人夫至一二十名夫役有限應付無  
窮驛傳焉得不廢撫按巡河管河等官務要  
痛革前弊有關文者照例應付廩給口糧馬

匹脚力無關文者不許一例應付親臨上司  
亦不許擅給批牌迎送往來其有司接遞夫  
役不拘大小官員所坐船隻止照舊例上水  
二十名下水十名敢有倚勢多索縱容下人  
賣放撫按管河等官先將船家拏問干碍職  
官指實叅奏前項弊端若上司官縱容不舉  
許被害人員奏告處治

一各處逃亡人戶拋棄故土流離他方皆因飢  
寒所逼或錢糧負累私債逼迫情非得已然  
安土樂業豈無來歸之願柰何有司不知存

恤聽信該管里老有復業者就令認賠拖欠  
稅糧承當重大力役逼迫無奈只得復逃田  
地經年荒蕪見在人戶愈加靠累今後逃民  
有復業者除免差役三年里長不許勾擾其  
荒白田地無田小民豈無願開墾耕種者亦  
因官吏里甲逼其認糧當差不敢承種有司  
即便出給告示曉諭但係久荒田地許諸人  
告官承種亦免其差徭三年三年之後如果  
成熟方纔量納輕糧如有不遵官吏里甲人  
等一體治罪各州縣官有設法勸諭招撫流



民復業數多及招人開墾承種荒白田地數多者俱作賢能官保薦擢用

一江南財賦所自出水利所係至重近年所司官往往忽而不講旱澇不備一遇凶荒稅糧無措浙江設有水利僉事帶管南直隸地方各府縣又復設有治農通判縣丞等官因循坐視廢弛已往不究着巡撫官督令水利僉事往來巡歷着落府縣治農官員將槩管地方水利講求議處何處水源所當疏通何處經流所當挑濬冬末春初將池塘填堰溝塍

圩岸趁時協力挑濬修築使高低之田俱有所備不爲旱澇所傷夫役取諸得利之家若工程浩大量起隣境人夫互相幫工合用錢糧巡撫查處先年導河夫用剩貯庫銀兩及贓罰無礙官錢應用不許虛應故事

一糧運船隻經由儀真瓜州二埧盤剝雇脚所費不貲儀真設有攔潮閘一坐春三月以後潮長之時可以過船近年工部委官偏聽壩上脚夫店家之言指以泄水爲由不肯開放管河官查照建閘初意上河水少自難開閘

若潮長河溢不拘軍糧民糧官民船隻一體  
循次開放無故阻當者罪之  
一鹽利乃民生所須近來官鹽阻滯不通鹽價  
高貴民食甚難而濱江濱海鹽徒興販無忌  
私鹽船隻多至數百往來大江張打旗號擅  
用火器兵器停泊地方貪利之徒公然替伊  
轉販遇有商民船隻因而劫掠卽今江南各  
府民間所食多是私鹽官引阻塞着巡鹽巡  
江御史督令各該巡鹽巡捕官司將鹽徒上  
緊設法挨拏務要盡絕仍根究官鹽何以不



通私鹽何以盛行應自處置者徑自處置事  
體重大者奏來定奪務使官鹽疏通鹽商得  
利課額不虧邊儲有賴若鹽徒勢衆原設巡  
鹽巡捕人役不敷巡撫巡江都御史酌量緩  
急調兵擒捕無令滋蔓以貽地方之害

一內外文武大小官員不能持廉秉公或剝削  
軍士或侵害小民或占奪庄田或擅作威福  
或把持民利或濫受民詞或交通關節或鑽  
投倖門以致政體紊亂人怨天怒文官着吏  
部都察院武官着兵部內官着司禮監嚴加

察訪責治罷黜果有害人實跡聽科道官糾奏

一皇庄及功臣田土該徵錢糧照例折銀中間有應分豁者卽與分豁原徵本色租糧其後一槩徵銀三分比舊加倍者宜照舊徵租糧安陸州莊田租銀亦照附近則例量爲減免一各處解到糧料草束白熟粳米牛皮銅漆薪蠟等項俱係小民脂膏收受官員不肯體念糧米則加倍多收又有歇家車腳錢大賊小賊錢木板蓆苫錢各庫銅漆等料亦各索取

常例京通二倉計石科取茶錢以致解戶犬  
戶及漕運官軍借債添賠輕則破產傾家重  
則妻孥累死小民之害此爲最甚今後有仍  
前故違分外需求科擾及監收官不行查革  
一體治罪

一守令之職實民生休戚所關但其間賢否不  
能一律必須上司鼓舞振作有所懲勸然後  
人肯盡力民得安生今後撫按官務要督同  
守巡官常川巡歷州縣查考各守令政務有  
無修舉覈其賢否實跡果有循良昭著不拘



進士舉人歲貢吏員量其年資深淺會本旌  
舉或先與誥勅或降勅獎勵或增秩賜金待  
後不次擢用其貪酷罷軟有顯跡者亦卽依  
律照例問擬發落相見之際務須待以禮貌  
不得非理凌虐

一在外司府州衛衙門或因公務往往差遣千  
百戶舍人承差知印吏典陰陽醫生旗甲人  
等下屬催趲未完行提人犯凡到所在官司  
延住日久需索無厭各州縣亦輒濫差皂隸  
兵快下鄉勾攝公事擾害小民無所不至今

後撫按官務要嚴加禁約違者從重治罪

一救荒積荒拋荒田地遺下稅糧派民賠納者  
所在官司須出榜召募不拘本府別府軍民  
竈匠儘力墾種照數出與由帖永遠管業量  
免稅糧三年三年之後照奏准事例每畝止  
徵官租瘠田二斗肥田三斗永免起科加耗  
及一應田上差役其槩縣原賠稅糧卽以所  
徵官租歲報巡撫衙門照數扣減

一鹽場鹵丁在濱海者照丁清撥草蕩或處置  
量與攤曬灰場在水鄉者照例止令納折鹽

米及原撥草蕩價不許再令僉補缺丁鹽課  
一臨邊城堡居民先年被賊擄去一時得脫到  
邊來降者守邊將官及守墩官軍不許誘殺  
報功以冒陞賞違者撫按官查究治罪

一各處軍衛有司巡撫官多不得人賊盜生發  
不能及時撲滅間獲真盜又輒受賂脫放反  
容令攀扯平昔有讎良民刑追贓物冤抑難  
伸今後撫按守巡官務要嚴加禁約凡遇選  
委巡捕慎擇操持公正官員不許濫用

一凡奏訴枉問罪犯者俱各行調隔別衙門從



實審勘務在允平毋得仍行原問官司以致  
冤抑不伸

一問刑衙門有因正犯在逃累及家屬監久者  
宜從保放正犯情罪深重者仍挨拏完結

一易州山廠府州縣佐貳官管運柴炭被攬頭  
誑攬侵費多致不完有正身已故又復拘繫  
家屬連年責併不得回還情甚可憫着備查  
各官若原無侵分情弊係攬頭花費者俱於  
攬頭名下追賠故官家屬給文釋放

一衛所屯糧多以管屯官貪污闖冒或侵收入

己或追徵不時以致累年不完軍士月糧欠缺數多着撫按官嚴督管屯副使僉事等官巡歷催併坐委附近府州縣能幹佐貳官公同各管屯官及時追徵如次年三月不完各衛所管屯官聽管屯副使僉事叅提問罪五月以後不完撫按將按察司管屯官一體叅究

一順天府論地養馬近年以來地多歸于勢豪之家其馬仍令本戶餵養瘦損倒失責令追賠甚爲貧民之累應天府所屬論丁養馬近

因備解駒馬每年止解備用馬價所養種馬  
或有倒失仍復責令買補民亦不堪着兵部  
通行議處以甦民困

一農衣食所自出今天下百姓不肯勤力田畝  
者實多江南等處各該撫按官宜通行所屬  
府州縣原額有治農官處不許營幹別差責  
令着實修舉本等職業專一循行田畝勸課  
農種原無官處定委佐貳見任官一員帶管  
果有實效聽具奏旌擢如或因循廢職作罷  
軟官罷黜



一各處俱設有養濟院但有司不能用心稽考  
衣糧柴薪不得以時關給今後撫按上司督  
責有司務將境內鰥寡篤廢之人照例收養  
應得柴米不許缺少在京雖有養濟院止是  
收養宛大二縣孤老其各處流來男婦篤廢  
殘疾者多無所歸啼飢號寒坐以待斃感傷  
和氣莫甚於此工部量出官錢於五城地方  
各修蓋養濟院一區盡數收養戶部議處於  
在官倉庫每名日給米一升錢二文仍着五  
城巡視御史提調稽考毋得虛應故事

一各處雖設有預備倉多無積蓄遇有饑荒無從賑給撫按二司督責有司照依見行事例設法多積穀米以備救荒仍依倣古人平糴常平之法春間放支以賑貧民秋成時月抵斗還官不取其息如見在米穀數少各將貯庫官錢并問過贖罪折紙銀兩趁秋成之時委的當官員糴買比時估量添二三文庶來者輻輳易於收積府以一萬石州以四五千石縣以二三千石爲率明立簿籍查考一遇凶荒減價糴與窮民仍禁約奸豪不許隱情

捏名多買罔利事發重治

一各邊鎮及腹裏地方設有兵備官員專爲保障地方防禦盜賊禁革奸弊有等不知事體官員本等職業未見修舉往往濫受民詞提人監禁中間多有與巡守官行事相背者屬官難以遵承往復呈請淹滯人難又有將各州縣民兵涉遠數百里之外調集團操妨民生理及有私立大漢等項名色在官聽候甚非事體所宜撫按官通行查禁今後如有仍蹈前弊不行改正者具實叅究



一下民嗟怨由於賦役不均。有司官員受財聽  
囑。或又信憑該吏里書。那移作弊。以致輕重  
不均。撫按官嚴督有司。官各要從公編派。務  
令高下均平。起運之糧。務儘上戶上門拖荒。  
折布金花銀等項。專爲輕減。小民不許受財。  
聽囑及做人情。奉承勢要。鄉官之家。如違許  
人戶具告。撫按官追究坐贓治罪。

一各州縣里甲之設。專爲催辦錢糧。勾攝公事。  
近年人戶逃亡里無完甲。見在甲首困苦不  
堪。有司官不得人見。年里甲本等差役之外。

責令輪流直日分投供給米麪柴薪油燭菜蔬等項遇有親識往來使客經過任意攤派下程陳設酒席饋送土儀添撥脚力甲首日加負累今後撫按二司等官務要痛革前弊着實查考犯者拏問罷黜若二司官員容縱不舉撫按就做罷軟官開報

一朝廷遇有災傷輒行蠲免但各該官司奏報稽遲及行覆勘文移往來耽延月日覆勘未報一面徵收及至蠲免文書到日良善小民懼怕刑責多已典賣拆騰運送到倉徒遂糧

里侵漁之計今後遇有重大災傷勘定分數  
即便出給告示曉諭人民知悉姑停徵收待  
明文至日施行庶愚民不爲奸人所欺

一大常寺光祿寺廚役有逃亡者先年該寺奏  
准要將在冊餘丁揀選補役免行原籍勾擾  
最爲兩便後又中止仍行原籍勾丁騷擾鄉  
民津貼盤費小民憚於應役未久卽逃有損  
無益禮部查原奏事理將逃故廚役冊內果  
有壯丁堪以替補者准令收役免行原籍勾  
丁若餘丁數少不敷照舊清解



一各處水衝沙壓坍江坍海地土節有事例除  
豁但所司多不奉行又或信憑下人作弊將  
有錢有力加倍開除無財力者不與分豁且  
所開地土稅糧不免攤派人戶包賠年久數  
多不無靠累今後凡告前項衝壓坍沒田地  
撫按務委廉幹官員親詣查勘明白方與除  
豁所遺稅糧各照本地方見行事例改派折  
減輕則上納庶不重累小民

一近年在外衙門多有添設官員其間奉公守  
法者固有其不才者非惟無益而反有害吏

部通行各處撫按官查近年添設官員果係  
緊要職務不可缺人方許存畱但無益官員  
具奏裁革

一各處民壯有先年額設者有近年添設者本  
爲防奸禦侮今承平無事太半供有司私役  
及做人情送人使用又有豪猾之徒承批下  
鄉騷擾良民勢如狼虎撫按官通行各府州  
縣查照原設之數應減省者量爲減省其存  
畱者分爲上下兩班一班務農一班在官操  
練武藝委佐貳官一員管領提調俱不許承

批下鄉及私家使用若有重大賊情方許通調操候事寧仍舊輪放違者罪之

一朝廷設立登聞鼓使匹夫匹婦凡有屈抑皆得自盡以防壅蔽近來司鼓官多不肯接受軍民冤抑無所控訴以致擅入闕下懷狀自刎者有之今後俱照舊例凡擊鼓者不許拒阻

一近京地方差徭浩繁人民十分負累如糧草養馬里甲驛傳等項皆照地起科量戶審編乃是常額近年以來常額之外每畝復徵銀



兩有白地錢有買地錢甚至無地之家亦派出錢民何以堪戶部行巡撫官通行查明除常賦外其新添白地買地等項銀兩應停革者卽便停革以蘇民困

一錢糧徵收律限具載收成之後小民麥穀在家官司嚴限徵收易爲辦納近來有司玩慢夏稅延至七八月秋糧延至冬深春初方纔開倉小民將所收糧米費用已盡雖嚴刑追逼不能完納今後務照律限開倉徵收有延緩過期以致民難輸納上司提問治罪甚則

作罷軟官罷黜若有司官不早會計實徵文冊下遲以致過期不得開倉者責在上官

一各州縣書手之設初爲書寫文冊磨算錢糧其久慣應當者事體旣熟作弊得慣往往受奸人賄賂將本戶稅糧飛灑派於別戶名下藏躲影射弊端不一不才貪官其或與之交通營利小民虛賠糧米致累家產今後撫按及二司官務要嚴加禁治敢有仍前違犯許諸人指實首告問發邊衛永遠充軍得過贓銀儘數財產追完入官給主官司縱容不舉

作罷軟官黜退有贓者以贓論

一京城內外人戶爲應當總甲火夫所害多有  
賣屋逃往鄉村各處避住其見存者差役繁  
重出錢數多愈加靠累今後除應優免之家  
外其餘排門逐戶俱輪流應當常川在鋪專  
一隄防火盜潔淨街渠不許該管衙門做人  
情送與官豪勢要之家擡扛脩理等項使用  
及不許夤夜令火夫執打燈籠往來護送如  
違聽緝事衙門訪拏叅究其打卯止照舊例  
於錦衣衛奉勅巡捕街道官巡城御史工部



街道官處每月一次及有事呈報其餘別項衙門打卯拘管等項盡行革去巡視點聞官校人等不許索錢擾害違者該城御史兵部官指實拏問究治

一民間差徭不均多由飛詭稅糧爲害有等奸豪富民大戶田地本多賄囑官吏里書虛捏名字花分詭寄一人之田分爲數戶規避重差又有將田地隱寄鄉官勢要之家托稱典賣假立文券勢家貪其厚賂田主利於免差作弊多端以致靠累小民困苦日甚今後撫

按衙門各轉行司府州縣出榜曉諭若有前弊速令自首改正其有不行自首改正者許諸人訐告或體訪得出從重治罪

一近年上司能事官員多要舉行丈地均糧之法但有司官員不能沿坵履畝逐一查勘丈量其勢必委之里書奸人賄賂交通遂致那移等則增減分數作弊多端其民間版籍已定一旦紛更變亂田未及均而民被其擾官司終年造冊里甲日費供給戶部通行各撫按衙門轉行各司府州縣官民間田地悉照

冊籍應當糧差查出奸弊卽爲究治改正不許一槩丈量改科自立新法生事擾民

一軍士養贍止賴月糧各該指揮千百戶等官指稱出辦月糧百端剝削未支以減半揭收將給則盡數扣除在內兵部在外巡按并分巡官務要嚴加禁約許被害軍人指實告理從重問罪革去管軍管事其各處軍糧缺乏多因官司追解遲延以致倉庫空虛無從支給今後各州縣派納各處倉糧務要布政司總理管糧官立限比併有過限者州縣官住



俸提問

二嘉靖元年至四年終各處拖欠牲口巡按御史備查其未徵未解果係小民拖欠者照數蠲免若係均徭總徵者酌量差銀內牲口項下該銀若干扣算蠲免

一在京官員及夫人病故止與該得祭葬其齋糧麻布一體裁革不許乞討

一民間利病所當興革詔書內該載不盡者各處巡撫都御史巡按清軍巡鹽巡茶巡馬巡捕御史等官會同司府州縣等官宜祇承德

意備查

祖宗成法與歷年詔旨所當舉行者逐一舉行限半年以裏將行過事宜開具奏報以驗勤惰之實其事情重大應奏請者徑自奏聞區處

一吏役到部免其罰班吏役冊雖未到亦准暫撥辦事待行查至日果有過犯量事情大小究治其辦事再免半年卽撥當該三十六個月內亦革去俸糧半年以存省國儲

一宛平大興二縣爲京師根本頃年戶口消耗遺下糧差貽累貧戶賠納其各處軍民人等

附住京城內外不下萬數俱各游閑影射絕  
無差役宜令戶部議處行令巡城御史嚴督  
各該兵馬司官逐日查審除浮居客商外其  
居住年久置有產業房屋鋪面者責令附籍  
兩縣一體當差仍暫免三年以示存恤若有  
冒假衛所籍貫者行勘發遣其該城官吏人  
等亦不得因而科害

一國初畿內地方人民稀少原奉旨儘民間開  
墾永不起科當時勲戚之家亦有欽賜庄田  
以資養贍迄今百六十年生齒日繁開佃無



遺縱有曠閑多係水衝沙壓不勘爲業除已  
賞庄田地土照舊亦不必查勘今後再不許  
聽信撥置動將有主之田朦朧陳乞以致小  
民窮苦不得安生敢有故違聽該部該科叅  
究處治

一京城鋪戶各有本行如酒醋局織染局及轎  
夫三行多取中產開鋪之家當差役優免本  
戶近年奸商人等躲重就輕投入其內遺下  
重大差辦累及貧窮其通州鋪戶亦多投入  
部廠轎夫身役影射數多宜令工部議處在

兩縣行巡城御史在通州巡倉御史各照原額查審收畱公用多餘之數退回州縣聽當別差

一雜犯死罪准徒五年及例該枷號發落者今後五年一次差官審錄有犯該前項罪名徒五年者減去一年枷號者就行釋放

一崇文等門外原有漏澤園近年多被勢豪侵占以致貧民無地藏掩宜令有司清查各園邊界責令還官及查近城相應空閒地土增置義塚仍行五城兵馬督率有主并有地者

令其安葬無主者官爲掩埋不許焚寄仍出  
榜禁約及通行在外衙門一體遵行

一各處司府州縣官員有專事虛文不惜民力  
往往因公擾民指一科十若造冊畫圖及修  
理書院起建祠宇刊刻書籍搨摹碑板等項  
勞民傷財以作無益宜行撫按官痛加裁抑  
甚者坐贓究治

一兵部抽選軍丁充實營伍不拘軍民人等但  
在京師附住年久俱准投充若順天府所屬  
州縣民戶自有本等民差若避重就輕投充



軍役者查審治罪仍發當民差

一各處衛所官員人等置買民戶田地往往州縣催徵不服拘攝以致糧差累及糧里賠納宜行撫按衙門并管糧等官申嚴曉諭今後官軍置買民田糧差一體坐派仍聽有司勾攝務使軍民兩便

一山東泰安州香錢每年類解布政司除補支王府祿米及官員俸糧折鈔外其餘收貯在庫稽考明白聽補銀差如京班阜隸及馬夫柴夫齋膳夫不及之數免致重派小民

皇明司今卷之二十一  
一各鎮遊奇兵調用防守經年不得掣回比之  
正兵尤爲勞苦宜着鎮巡官議處遊奇兵有  
警照舊征守無警掣回原衛或與正兵輪流  
撥用以均勞逸

一今日之弊患在賄賂公行請託無忌以致職  
戎伍者剝削軍士司民社者剝削編民上下  
交征貪饕無厭閭閻之下十室九空宜着都  
察院轉行各處鎮巡及文武職官各宜守分  
若有仍前夤緣納賄者在內從科道官在外  
從巡按御史及按察司糾劾

一各王府分封既久宗枝日蕃民間地畝所出有限而祿米歲增未免供用不給以致各府往往赴京陳奏宜行撫按衙門通融區畫或事體重大奏請議處

一易州山廠止供柴炭一事先年原設司府州縣等官俱有額員其後隨革隨畱惟順天府二十七州縣止畱通判主簿各一員足勾管理其餘八府尙未減革循至於今見任者七十員近已有旨一應柴炭俱許招商上納前項官員似涉多餘工部便會同管廠侍郎查



照原額并各府州所屬夫多者量畱二十四員兼催錢糧外其係後來添設四十七員之數應否裁革別用再加議處務期經久可行不至誤事

一國朝設立衛所置屯田令軍士耕種納其餘糧以充歲餉近來法久人玩姦豪官舍軍餘人等霸占者多兵部便行各該巡撫督率管屯方面等官查勘某衛某所屯田若干分屯軍若干名其在官舍軍餘名下占種者係年久故軍之田仍與領種代納糧草如軍見存

無田者卽令退還本軍爲業其領種故軍之  
田一人止許一分一戶止許二分其餘亦令  
退出以給未領之戶新附之軍內有修成廬  
舍植過園林願賣者亦聽平價贖買管屯官  
仍將查過退還緣由并增出糧草數目造冊  
送部以憑稽考

一內外逃軍該部不論遠近一槩發冊清勾內  
有丁盡戶絕原籍官司已經回答五十次者  
有之二三十次者有之勾撮之時特資吏胥  
里老之弊而已以旣絕難繼之軍擾平居無

故之民於軍無益於民有害兵部卽查原籍  
行勾曾經回答戶絕十次以上者不必濫開  
以致擾害

一疑獄未明人情所苦近來各處問刑衙門監  
禁強盜人命未決及充軍追贓人犯有疑似  
不明真僞未分者蓋緣起初原問官司或執  
偏見或肆貪酷不加詳慎有以刑逼坐贓者  
有因同名誤坐者草次取供遂成卷案豪猾  
者反以僥倖脫網良善者仍以無辜受禍以  
後歲月漸遠官吏屢更拘泥成案者不肯與



辯避嫌疑者不敢辯結憤牢獄實傷和氣都  
察院便行文與各處巡按及審錄官各兼至  
公勿拘成案勿避嫌疑酌見冤枉卽與辯理  
情重者奏請定奪以雪民冤

一各邊軍職有因繳冊違誤限期催徵不逮原  
額馬匹不及分數一切住支俸米十乃八九  
遠者已逾十餘年近亦不下五七歲父母妻  
子無所顧養以致嗟怨之聲上千和氣兵部  
便與查議奏請凡因公事住俸年久者候命  
下之日悉與關支違者治罪

一正德年間軍職冒濫陞授數多已有詔書事  
例查革但恐承委官員奉行太過致將例不  
該革與詔書開載不合者一槩混革未免人  
心嗟怨且無以激勵後人兵部查議明白若  
果例不該革之人開具事由奏請改正不許  
一槩混開以滋冒濫之弊其各該人員例應  
減革而朦朧比照陳乞奏擾者該部該科叅  
究治罪

一詔書到日所在官司務要着實奉行仍刊布  
傳給使戶曉人知若官員乘斯添減返害小



民被害之人奏告治罪

於戲應

天以實必上下之交修視民如傷合遠邇而一致當  
春陽發育之候施同仁曠蕩之恩庶幾化洽  
於人和用以培植乎國本詔告天下咸使聞  
知



正德年間軍職冒濫陞授數多已有詔書事  
例查革但恐承委官員奉行太過致將例不  
該革與詔書開載不合者一槩混革未免人  
心嗟怨且無以激勵後人兵部查議明白若  
果例不該革之人開具事由奏請改正不許

錢人味民以辭尊卑國本諸吉天不可欺外間

卷之五

天以實必主不之交也則只收謝合裏而一姓當

侍通縣已所任官司務要着實奉行仍刊布

皇明詔令卷之三十





